



ZÂL & BLU

I colôrs dal Tavagnà a jemplin la Dacia Arena

Cui che al jere presint ae partide dai 27 di Zenâr al sa che la atmosfere te Dacia Arena e jere diferente dal solit: curiose e lizere, frescje e atente, ma so redut fate di novitât e di braûre.

Lis 4000 sentis de tribune centrâl e laterâl nord a jerin plenis di tifôs ma ancje di curiôs par viodi il stadi cui colôrs che lu rapresentin di simpri: il zâl e il blu, e il blanc e il neri.



Credits: pagine FB UPC Tavagnacco calcio femminile

Cheste volte il stadi - viert dome intune sò piçule part - al jere in ecitazion no pe partide dal Udin, ma par chê de UPC Tavagnacco cuintri de Juventus, ven a stâi de tierce squadre cuintri de prime in classifiche dal campionât di serie A feminin. E disinle dute, se a jessi viertis no fossin stadis dome la tribune centrâl e chê laterâl, il stadi al sarès stât sfodrât di int a svintulâ lis bandieris dal Tavagnà. Lis zuiadoris de nestre squadre

zale e blu, nus àn dimostrât la lôr preparazion atletiche, la lôr determinazion e dute la lôr braûre in 90 minûts di partide, cun ancje cualchi ocasion pierdude tant che cualchi indecision tai passaçs (e forsit ancje dal arbitri) e un pâl tal finî de partide che al varès podût segnâ la pate finâl.

Ce che no à vude nissune insigurece e je stade la fuarce des nestris feminis dal Tavagnà di crodi fin insom inte pussibilitât di zuiâ une di intal templi dal balon furlan. A son rivadis a fâ vèr il lôr sium di zuiâ intal stadi pensât e fat pes scuadris di ecelence dal nestri Friûl, daspò de esperience dal an passât tal stadi Franchi di Firenze.

Il risultât finâl cuntun gol de UPC Tavagnacco, al à daûr cetancj significâts: dongje dal prin gol tal stadi di Udin fat di une zuiadore

(Mascarello, 7m), ai colôrs de nestre squadre, che tes tribunis a vevin un valôr ancjemò plui fuart stant che a son ancje i colôrs de nestre bandiere, o zontin la presince impuartante e numerose dai tifôs e des tifosis di cheste squadre. La dimostrazion che il balon feminin de nestre regjon al è preseât e che al à dutis lis potenzialitâts che une squadre di serie A e à di vè, ma che ancjemò, masse dispès, no si i crôt fin insom.

Cheste zornade siore di emozions e di realizzacions di siums e restarà a dilunc intai pinsîrs di cui che al à vût il plasê di jessi sentât intes tribunis dal nestri Stadi. E deventarà dal sigûr un element par sostignî ancjemò di plui cu la perseverance e la fuarce - che a son ancje lis carateristicis de UPC Tavagnacco - cheste squadre e domandâ la visibilitât che e merete.

Domandâle ancje midiant de nestre lenghe, denti e fûr dal Friûl, come che nus àn bielzà dimostrât lis stessis zuiadoris inte promozion di cheste partide cuntun biel spot par furlan, parcè che balon e lenghe furlane a son dôs ecelencis ricognossudis e impuartantis dal Friûl.

La passion e je la nestre fuarce, in cualsisei sport e categorie, intal balon feminin e in chel masculin, e nô o podin dome augurâsi che il nestri Stadi al deventi di par di la cjase dal balon masculin e di chel feminin di serie A.



Credits: pagine FB UPC Tavagnacco calcio femminile